

Jeneſis

Sapta 1

Bro Nkifrar nda bbnſofti yo mount yorhwa tandet tandetm hingrnamo yuhathu tndhkfot

1. Bingot mifn Bro Nkifrar rihingrna wonakmohat nda bbnſofti mount, 2. nda tkitm afo bbinſof dohatm rhumom be marombrpat rhumotn yfungtamot. Marombt furif hmbremott, Bro Nkifrarhu Yafotharpatn hta habrimout. 3. Tfitn Bro Nkifrar kfo pthamor, "Nukeft aniat." Inji kfomotr ee nukeft niamot. 4. Bro Nkifrar nd nukeft htihato yindhormor. Yindhorrhato fak nhtamorſ nd yfungti nukeft. 5. Nd nukeft futamort marr, tfitn kſppam futamorm yifungt. Ndr gashof yharſ inji hingrnamor.

6. Yo tfitn Bro Nkifrar kfomotr nd tingrm ſinyamomn nd marombt tuh kaſimo griſt tingrmn hamuhaknimomt.

7. Nd griſt rot yura mfak nhafohmot marombt yiro warhumot. 8. To be nd yurakkort futamort mount. Nd nd hingrnefm hingrnamo yhar futamorſ huſyuk yhar.

9. Yo tfit Bro Nkifrar kfo memor, "Bupam rpako arimak nhafohkahtm bbnſoft mfnahraht." Inji kfomotr

ee bupam rpako rifak nhafohmom. **10.** Nd kna trohmo tkitt futamort bbnyssoft. To nd bupam rpakor rim niak nhafohyukm futamorm marombt. Bro Nkifrar turhu hingrnayuk hingrnefm htihato yindhormor. **11.** Yo tfit kfomor "Womhtet womhtet yukha horet mim tamohetet tamohetm yukha tfa horetm asinyatwam." Inji kfomotr ee sinyamom. **12.** Inji sinyanamotm htihato yindhormor. **13.** Nd nd shrim hingrnamo yhar futamorr husfirpehyuk yhar.

14. Tfit Bro Nkifrar kfomor, "Fnhuyefthu hayukm ayarim fnahtwam mountn. Yarim fnahkahmn nd fnhuyetm yak nhtarahmm yham, yfungm, yamm ee gunyjmm. Nd gunyjmmn yak nhtarahmm morm yham, kut yham ee yuworhu yham." **15.** Nd fnhuyetm bbnyssoftu nukefthu hayukem.

16. Bro Nkifrar htamorf marri yamt. Marr masat tayetrn htamorr nukathu fnhuyefthu hayukr. Yamti gunym htamorm yfungthu nukefthu hayukm.

17. Nd fnhuyetm htamorm bbnyssoftu nukefthu hayukm.

18. Marr nukathu tayuker. Yamt yfungrhof tayuket. Rofn fak nhtamofm yhami yfungm. Bro Nkifrar turhu hingrnayuk hingrnefm htihato yindhormor. **19.** Ndr husfihusyuk yharn inji hingrnamor.

20. Tfitn Bro Nkifrar kfo memor, "Yiram yo tamoh tamohm adborhatwamm tekm. Yura mountko nungwayett arhutwat." **21.** Be Bro Nkifrar inji kfomotr, womhtet womhtet yira brom, habhi yiren m dborhamom. Yo womhtet womhtet nungwayett rhumot mount. Turhu hingrnayuk hingrnefm htihato yindhormor. **22.** Bro Nkifrar tire yak wus bo wushato kfo memor, "Niko tekthu yirako, yura yafuna nungwako wafur kanitkahkomn. Yak

thunitwakomm tkit tkitm. **23.** Ndr tiryocht yharn inji hingrnamor.

24. Tfit Bro Nkifrar kfomor, "Womhtet womhtet yemrom adborhatwam bbnysot. Tirf yemrom, graf yemrom, bro, habhi, inji arhutwam." Inji kfomotr ee inji dborha nhtamom. **25.** Bro Nkifrar tur hingrnamo yemrom htihato yindhormor.

26. Tfit Bro Nkifrar memor, "Yimam ahingrnanomm nom kanjo rhetm. Romn tohukatohrahmm yiram, nungwam, kmi tirf yemrom, graf yemrom, brom, habhim." **27.** Yo Bro Nkifrar met yindarif hingrnamorf ror kanjo rhumof.

28. Inji hingrnamorf, tire fak wus bo wusmorf. Yak wus bo wushato ptha memorf, "Nifn bok yonetfn rhurahfn, nifnhu frikeftn furkahnihato yak thunirahmm bbnysot nymbuham. Yak thunirhwam romn tohukatohrahmm yemrom. **29.** Na kahukwanko nda womhtet womhtet yukha horet mimi tamotet tamotetm nikmoh yayukm. **30.** To na kahukwanm yemrom rfotwam rroh ye miskayukm." Inji kfomotr ee inji namom. **31.** Bro Nkifrar turhu hingrnayuk hingrnefm htihato yindhormor. Ndr wafithu yharn inji hingrnamor.

Sapta 2

1. To benji Bro Nkifrar hingrna bugamorm mounti bbnysot, ee nd tamoh tamohm nd mounti bbnysot yorhwam. **2.** Hingrna hna hingrna hnahato yiktn rhu krnamor. **3.** Rhu krnahato memor, "Hrek na rhu krniwa, ndnatn na kfiwa ndarr bro yhayer." **4.** Tot inji Bro Nkifrar mounti bbnysot hingrnamo yuhat.

Iden korhof mswirt

Nkifra Yawer hingrnamohat mounti bbnyssoft, buriohr tafito wihrmoar. **5.** Ndnatn mishu duhatt, kipr duhatt rhumot ndar bbnyssoft. Yo nhai yimam mswir htayukm.

6. Tu nhai mif buriohr wihrmoar, tu yiro korhof burifhu pat mfnahmoutm bbnyssofm bupetm rhumoum.

7. Tfit Nkifra Yawer bbpam yakmorn hingrnamorr yimar. Hingrnanihato ssfoneft hemorr kusm yuhat. Ssfoneft henyihato yafothat tuh ymbrenyimorr.

8. Tfit Nkifra Yawer bro dborioh mswirt nuhtamor marr yuwa muhwako. Nd mswirthu yufat Iden. Nd kmitn htamorr nd ror hingrnamo yimar. **9.** Hingrnamorm dborioh dborioh ruhet mimi hifa yukha hiret mim. Bhunano sinamof hus mif, womt yimaroh yafotha hayukt. Yo womt yimaroh dborioh nefmi fasoh nefroh yak dukayukt sinamot nd kmi Identn.

10. Tekt trhamot Identhu bupa hanyeftn. Tfit fawiko mihtamotn husfihusf tek wongnm yimom.

11. Gashof tekt rothu yufat Pison, kmi Hafirat toni habriwut. **12.** Nd kmi Hafirat korhwom gor tahim. To

tot wom dborioh mis ndha tohwot. Rothu fipam hifa mthewom. Nd mis kutewumt bderiam. Yo ndombha tohwor womhtet dborioh tahir rorhu yufat oniks. **13.** Wom

tekthu yufat Gion. Nd tekt toni htfaswot kmi Kusn.

14. Yo wom tekthu yufat Taigris. Rot toni hanitt marr yuwa muhwa korhof kmi Asiriatn. Wuroh tekthu yufat Yupretis.

15. Nkifra Yawer yakmorr yimar, htamorr nd mswir Identn. Memor, "Hingrnarhwarn tohuktohraht mswirt."

16. Htahato memorr, "Ni wayetwanm nd mi bugaroh

yukham. **17.** Nd yimaroh dborioh nefmi fasoh nefroh yak dukayuk mirpathu yukharpam mirahn ayak ayemifanm. Yak yerahn, nd yeyuk yharn nohrahn." Inji kfomorr.

18. Nd yimar turpar tohmoatr Nkifra Yawer htihato duka memor, "Nda yimare turpar tohrahr? Ahingrnayant rorhu toh hingrna nhoyukt." **19.** Natpo Nkifra Yawer bbpam yakmorn barkofpam afo hingrnamorm bbnysofthu yemromi yura korhof yafuna nungwam. Hingrna buganihato hanymorm yimar pno yufa yutaneft. Hanymotrm yufa futa nhombra bugamorm. **20.** Nd yimar yufa yutani bugamorm, to nhai tu yimar pno toh nhoyukm.

21. Be inji htihato Nkifra Yawer kfomotr yimar hwe guna tuhmor. Inji hwe guna tuhetrn fak sfiohakmorr kkraspir. Tfit fak marnyafmorr nd kkraspir yakmo tkitt. **22.** Nkifra Yawer yakmorr nd kkraspir, hingrnamort mett. Hingrnahato hanymort yindari pno. **23.** Yindarir memor, "O be nanhu toh nhoyukt ka bi asot! Rothu tpi nmhapam nanhumn hingrnas be yutarhwant mett." **24.** Ndnatpno inji newnom: Yindarir tuhant yaknihato be yifammaf htanyhato mett pno rpat tohwof.

25. Met yindarif rmontha duhatf benji bmbobrif tohmouf. Rof tohmouhat nhai nahti yimtnarmoaf, benji toh furamouf.

Sapta 3

Hanyjbornamoft Bro Nkifrarhu mrokfeft

1. Nkifra Yawer yemro hingrnamohat hifa hingrnamorm. To nd nandomrpar masat kfo nhebehetr rhumour. Nd nandomr kfo nhehmort mett, memort, "Ka Bro Nkifrar famurfne mirahfn ayanonm nda mi bugaroh yukham?" Inji ttiwonmort.

2. Kfo yakio memotr, "Uwa, nda mi bugaroh yukham kawononm. 3. Tmift nda bhonano tohwa mirpat famurno, mirahfn ayanonm nd mishu yukham. Yo mirahf ayak tiwonnonm. Yak tiwonrahfnm, to be nohrahfn."

4. Yo tfitr randomr hanyjbornamort, memort, "Nhai nohrhwafn. 5. Nifn yerahfnm nda mishu yukham, hti dukarahfnm dborah nefmi fash nefm. Hti dukarhwafnm, Bro Nkifrar kanjo rhurahfn. Ndnatn Bro Nkifrar inji ukahato famurfn, mirahfn ayanonm nda mishu yukham."

6. Nandomrhu mrokfo tuh yhumotmt mett duka memot, nda mishu yukham yanyef ka hifa. Nd atpo nd mishu yukham hti yuhurmotm. Hti yuhurhato memot, "Na nda

mishu yukham yakrhwanm, ka be bok dukefm dukarhwa." Ndnatpo miyukham yak famotm. Ye siwonhato mkut hemotr ramemr. 7. Be nd mi yukhat yenyihato be ndnatpo tuf nhati duka memof no sfno bmbobrifno tohwono. Ndnatpo rfotwam yakmofn nahumof rmontha kanjo. Nahunihato nyhumofm. 8. Krifnano Nkifra Yawer kmifat yau hnamotr wany yakhato kafrohmf buharhof mispitn. 9. Yo Nkifra Yawer nakumorr yimar, "Ni fitha yorhwa?"

10. Yimar kfo fakio memorr, "Ni wany yakhato nda mswirt yau hniwatn na rmontha duhayann yanhohato kafrohwa."

11. Yawer ttiwonmorr, "Frohmn kfitmn ni rmontha duha yorhwa? Ka bi fawont nd na kfo rafomo mi yukham?"

12. Yimar kfo fakio memorr, "Nda mett ni yahut, nanhu toh nhoyukt, rotn yakhato fahuta. Yahutta bi fawoyant."

13. Tfitn Nkifra Yawer ttiwonmort mett, "Tamohmpno inji ne?"

Tfitn rot kfo fakio memotr, "Nandomr kfo nhebehtra fawoyant nd mi yukhat." Mett inji kfomotr.

Bro Nkifrar kfomorm

14. Nkifra Yawer kfomorr nandomr, "Ni kfo nhehnt mett, ndnatn ninrpa yak tutfarhwann. Wom yemrom afo yak tutfarhwatanm, nhai, ninrpa. Ndar yhar, wom yha yham be yatiefe wiyauyau hakurahn. Be nda bbnysofthu krpum ye hakurahn.

15. Metti nine nnamburrahfn. Yo ninhu frikati rothu frikat nnambur nnambur hanyrahf. Rom yahotrahm

ninhu mfhat, ni yerahnm rroh wurengnham." Be inji kfo toyamorr.

16. Tfitn kfomort mett, "Ni yon fanetn rhurahn, bro krhopa yakrahn. Ninhu yon nur yhar yhotato rpharahn. Ni inji rphathoft, to nhai krurhwatnr ninhu ramemr. To tfit yuhurahrn. Rorn tabohifat yimbrirahrn."

17. Yawer kfomorr yindarir, "Ni metthu mrokfefm wany yakiohato fawonm nd na kfo rafomo mi yukham. Be ndnatn na yak bebrhwant bbnysotf, yeshorm afo sina marnyarhwatm. Ni tunhu hingrna bubukaneftn yeshorm sina marnyarahm bbnysotf. **18.** Ni hingrnarhwa mswirm mbri sina hakurahm kiprti higefm. Be inji yifakorhof wuritwam ye htfas hakurahn. **19.** Ni tu hingrna bmtarahn, yikiapam misuhrahm, ee yeshorm sina marnyarahm bbnysotf. Hingrna hany, hingrna hany, be nohrahn. Nohrhwann yoprahmn. Be tfit yiro bbnysotfn bbpam keboktrahn. Bbpaye hingrnamoyann ndnatn riahn bbnysotf."

20. Adamr futamort metthu yufat If, nd yufathu yimbuyeft: yimaroh nkifra mmemt. **21.** Nkifra Yawer yemoroh tham yakmorn hingrnamorm rmontham kanjo. Ndmn hemotrf nyhumof.

Bro Nkifrar fak tuhafmorf Adamri Ift nd mswir Identn

22. Wom yhar Nkifra Yawer kfomor, "Nd yimar dborioh nefmi fasoh nefm bi dukewurm, nom kanjo ruhetr. To nhai nom hti marsakfot nd yimar brbo yikfot nd yafotha hayuk mis pno. To yerhwarm nd mi yukham, be toh yifa htarahr yha yham." **23.** Ndnatn Nkifra Yawer fak tuhafmorf nd mswir Ident. Tkrurafmorf, memorf,

"Waikahfnn wahingrnatwafn nd na ni hingrnamo
bbnysoft." 24. Yawer yak tuhafmorf, htamorm bro
namburet mounmotmi kah funayet kimt. Tohhato nd kimt
kebokt kebokt hasiwut. Ndnatn yimam finji yikahm nd
mispit.

Illustrations copyright © David C. Cook Foundation,
American Bible Society, United Bible Society, and
Horace Knowles - The British and Foreign Bible
Society, London, England 1954, 1967, 1972
are used by permission.

Published 1987

Printed by the S.I.L. Printing Department
Ukarumpa, E.H.P., Papua New Guinea

ISBN 0-86893-224-8